



Nammineq kissaatiginngisaminnik meerartaarsinnaangitsut Qallunaat Nunaanni IVF aamma ICSI-mik ikiorserneqarsinnaangorlugit angalanermullu, najugaqarnermut, misissortinnermut aammalu ikiorserneqarnermut aningaasartuutit peqqinnissaqarfimmiit akilerneqartarnissaannik neqerooruteqartoqartalernissaa pillugu Naalakkersuisut peqquneqarnissaanik Inatsisartunut aalajangiiffigisassatut siunnersuut. Tamatumani siunertaralugu nammineq kissaatiginngisamik meerartaarsinnaangitsut ilaqtariinnut inuiaqatigiinnullu iluaqutaasussamik nuannaarutaasussamillu meerartaarsinnaangornissaat.

(Inatsisartunut ilaasortaqaq Anna Wangenheim, Demokraatit)

(Siullermeerneqarnera)

Qujanaq Demokraatit Inatsisartunut ilaasortaataitaannut Anna Wangenheim-imut siunnersuummut pitsaasumut iluarinartumullu.

Inuit amerlanerpaat, imminnut asasut, inooqatigiinnerminni arlaatigut meerartaarnissaminnik kissaateqalersarput. Amerlanerpaallu aamma pilluarneq asanninnerlu oqaasertaligassaangitsoq misigisarlugu, angajoqqaangornitsinni. Asanninnerlu taanna qaminneqaqqissinnaangilaq.

Amerlanerpaallu ajornaquteqanngitsumik meerartaarsinnaasarput, arlalinnullu tamanna unamminarsinnaasarluni. Allatut oqaatigissagaanni meerartaarnissaminnut ikiorserneqartariaqartarlutik. Katsorsaatit ineriartorsimaqaat, tamannalu kinguneqarpoq, namminneq kissaatiginngisaminnik meerartaarsinnaangitsut angajoqqaangornissaminnik kissaateqarnerat piviusunngorsinnaalersimalluni ikiorneqarnermikkut.

Maanili nunatsinni ajoraluartumik imaappoq, aalajangertoqarsimammat, namminneq kissaatiginngisaminnik meerartaarsinnaangitsut Qallunaat Nunaanni IVF aamma ICSI-mik ikiorserneqarsinnaangitsut. Tassalu imaalluni namminneq kissaatiginngisaminnik meerartaarsinnaangitsut taamatut katsorsarneqassagunik namminneerlutik akilertariaqassallugu. Peqqinnissaqarfimmi tamanna assigiinngisitsinermik pilersitsivoq, tassami taassuma kingunerimmagu, namminneq kissaatiginngisaminnik meerartaarsinnaangitsut qaffasissumik isertitalit kisimik, ikiorneqarsinnaanerat. Taamaattariaqanngilaq.

Taakku saniatigut erseqqissartariaqarpara, maani nunatsinni meeqqat kissaatigisat pisariaqartikkatsigit. Inuttussuseq appariartorpoq, meeqqiornerullu qaffannissaa pisariaqartipparput, atugarissaarnissamut-sullissinissamullu qaffasissusissatut kissaatigisarput, piginnassagutsigu. Aamma tamanna tunngavigalugu pitsaanngitsumik pingaarnersiuneruvoq, maani nunatsinni namminneq kissaatiginngisaminnik meerartaarsinnaangitsut angajoqqaangornissaannut ikiorneqarusunngippata.



Taamatut oqaaseqaateqarluta siunnersuutip akuerineqarnissaa innersuussutigalugu Ilaqutariinnermut-
Peqqissutsimullu ataatsimiititaliami suliareqqinneqarnissaa innersuussutigaarput.